



Pagina da Surmeir
7460 Savognin
081/ 684 28 38
www.u-r-s.ch/sites/pagina.html

Medienart: Print
Medientyp: Tages- und Wochenpresse
Auflage: 1'700
Erscheinungsweise: wöchentlich

Themen-Nr.: 540.020
Abo-Nr.: 1095510
Seite: 16
Fläche: 46'259 mm²

BARVOGN: giubileum dalla «Swiss Tavolata»

Hospitants e giasts: ena famiglia

G.N.S. Siva dad en onn dattigl la «Swiss Tavolata», l'avventura culinara sen en bagn puril. An noss cantun èn tschintg pouras cuschinieras ed ospitantas e dus da chellas èn datgesa an Val Alvra. L'emda passada è nia fatg bilantscha a Barvogn.

Ena pouira fitg activa, innovativa ed ena persunga tgi ò plascheir da cuschinar è Migga Falett da Barvogn. Cugl sies om Fredo Falett, magna ella en bagn puril cun tratga da vatgammamma ed armainta e cultivos vignan dalla famiglia pros cun ena surfatscha da 35 hectaras. La patrunga è dantant betg angal pouira cun corp ed olma, na ella è er ena cuschiniera passionada. Uscheia è Migga Falett er sa participada all'amprema ediziun da »Landfrauenküche«, tgi «SRF» ò emess igl 2007. La pouira da Barvogn ò alloura avant otg onns er gudagnea chella concorrenza ed è anfignen oz l'unica donna da noss cantun tgi ò gia chella onour.

Dalunga stada incantada digl project

Migga Falett, ena cuschiniera passionada, è stada dalunga incantada digl project «Swiss Tavolata». L'ideia da porscher tetg a giasts e da sarveir a chels en menu ainten l'atgna tgesa, dereiva dall'Italgia, ò dantant gio siva angal en onn en resung positiv er an Svizra. Strousch tgi Migga Falett ò santia dall'ideia dall'Uniun dallas pouras svizras, è ella dalunga sa decideida da darveir las portas digl sies bagn puril a giasts e tots interessos dalla «Swiss Tavolata». Esser ena buna hospitanta, vurdar bagn digls giasts e cuschinar products tgi dereivan digl agen bagn puril, gist chegl mantgeva anc tar la pouira plagn veta ed iniziativa. Igl è ossa damai

gio en onn tgi Migga Falett e sia famiglia èn dus gedas agl meis hospitants da seis anfignen otg persungas, allas qualas vign sarvia en menu da treis plats cun products digl bagn puril. La pouira dei, tgi igl interess per chella avventura culinara seia fitg grond, igls giasts gioldan las tratgas simplas ed anc pi fitg l'atmosfera singulara. Sa lascher eir bagn ainten ena steiva purila, chegl seia tuttegn ena purscheida tgi dat betg gist dapertot, dei Anna Barbara Eisl, tgi segna tar «Swiss Tavolata» pigl marketing.

76 francs sainza e 96 francs cun vegn

Aint igl frataimp dattigl an Svizra 36 pouras ed en pour tgi sa participeschan activ agl project turistic. Scu gio menziuno èn er tschintg pouras grischunas dalla parteida e dasper Migga Falett è cun Maria Thöni da Stierva anc ena sagonda donna da nossa regiun, tgi sa legra da cuschinar e da sarveir bunas tratgas a giasts da gliunsch e da manevel. Per en menu da treis plats ins paia 76 francs inclus en apéritif cun ena bavronda speziala, salsiz, caschiel e pang cun peira digl bagn puril. Cun mintgamai en bitgier vegn alv e vegn cotschen costigl alloura 96 francs per persunga. A Barvogn ò ena bela cumpagneia cun represchentants dall'agricultura, dalla politica e digl turissem fatg viva sen en onn «Swiss Tavolata». Bler lod ò igl project retschet da Magadlena Martullo-Blocher, la patrunga dalla «EMS Chemia», tgi ò menziuno tgi la Svizra dovra urgent l'agricultura e cunzont er pouras e pours iniziativs. Per Svizra Turissem seia «Swiss Tavolata» en product da nischa ed ena purscheida esclusiva ò detg Tiziano Pelli. Thomas Roffler, igl president dall'Uniun purila grischuna ò detg, tgi chella purscheida culinara seia da gronda valour pigl maletg dall'agricultura e fetscha bagn a tots.

Datum: 24.09.2015

La Pagina

da Surmeir



Pagina da Surmeir
7460 Savognin
081/ 684 28 38
www.u-r-s.ch/sites/pagina.html

Medienart: Print
Medientyp: Tages- und Wochenpresse
Auflage: 1'700
Erscheinungsweise: wöchentlich

Themen-Nr.: 540.020
Abo-Nr.: 1095510
Seite: 16
Fläche: 46'259 mm²



Dus pourses iniciativas ed ena patrunga iniziativa. (da san.) Magdalena Martullo-Blocher, (Ems Chemia), Tina-Maria Ritz-Benderer, presidenta pourses grischunas e Migga Falett, pource e hospitanta.



La «Swiss Tavolata» è en success e chegl er a Barvogn, noua tgi vign sarvia igl menu ainten la steiva da pourses digl bagn puril dalla famiglia Falett.